

皇清文穎續編

皇清文穎續編卷二

論

閏月定四時成歲論

儀親王永璇

蓋聞三光爲陰陽之精氣本在地而聖人實統理之
節宣不過然後天人之際克諧起消息正閏餘於是
有天地神祇物類之官民是以能有信神是以能有
德則陰陽調風雨和茂氣至閏法之所係匪細故矣
請申論尚書閏月定四時成歲之旨昔堯以放勳之

德敬授人時分命羲和恐氣盈朔虛之有差忒也於是乎置閏自堯以前顓頊命南正重司天以屬神命北正黎司地以屬民而黃帝始正閏餘其於氣盈朔虛之道蓋有開堯之先者而鴻荒未易精核矣至若三正循環同歸欽若秦并六國升至尊之日淺顧亦頗推五勝而度數閏餘未能覩其真玉燭未調而歲功不成有自來也夫聖人者與天合德與時合序先而不違後而奉時凡以釐工而熙績也邵子皇極經

世曰一歲之中六陰六陽三年三十六日故一閏五年六十日故再閏說者以爲常數退六日爲陰進六日爲陽卽盈虛之說所以置閏但觀中氣所在以爲此月之正閏前之月中氣在晦閏後之月中氣在朔蓋盈虛積久則溢有歸餘之數而後無倒置之時無倒置之時而後成章節紀元之歲非其大較歟中氣者何也天之示人以微者也氣之中於十二月有定歲差則無定以無定定有定卽如每章有七閏入章

三年中氣在秋末六年中氣在夏末九年中氣在春
末十一年中氣在冬中十四年中氣在秋中十七年
中氣在夏中春夏秋冬之令成而十九歲之中無物
不得其序矣由此觀之歲差歲餘不可不講也在虛
在箕之日不可不推也積日以附月積月以附年易
詳歸功禮重居門豈徒觀於斗指兩辰之間謂無當
於釐工而熙績哉

擬四子講德論

謹序

薛宁延

上章執徐之仲秋恭逢

皇上五十聖壽維時海寓乂安雨暘時若兆民樂愷
六服內外謳謠舞蹈敬祝

天子萬福萬壽

小臣

陝關下士文質無所底過蒙

恩寵猥以橐筆塵史職嘗慕漢臣王褒作四子講德
論旁徵曲喻華而得度瞻而有體謹師其意擬
萬壽祝辭一首極知才識舛陋不足頌揚

高厚竊自效其愚忱云爾其詞曰

大庭之野建德之廬有飲衡處士焉與淳頤子爲友
居則蔭松桂食則饜葵藿敦仁祖義沖融淡泊皇華
大夫過之曰此飛遯離俗者乎詠小山招隱之篇下
車而揖之曰鷄鵠海鳥而知天風螻蟻穴蟲而知天
雨朱草盈而知望梧葉美而知閨抑鳳凰之所棲毛
羽也先生遭逢

聖世壽考作人櫨櫛居臬不遺榛楮乃負暄而逃其

賞甘芹而私其味豈未覲

魏煥歟今

天子垂統理順衣宵食盱綏四夷則如海之朝宗鼓
萬物則如金之受鍛雲臣烏紀事殊昏旦猶且揚進
善之旌開禮賢之館先生其不聞耶而淪寂若茲淳
頤子粲然笑顧處士而不答處士恐大夫慙則曰鄙
人遁空谷者心與石頑雖子博我以

皇道愈蠢蠢然然亦有說願大夫少顛駟珂夫鬱儀

曜矣樺燭不足以爲明豐隆震矣布鼓不足以爲聲
鵬奮六翮而游乎寥廓朝發崑崙夕飲洞庭又豈腹
下毳毛所能爲之重輕乎仰聞今

聖人用心若鏡洞乎八埏襲冠帶於焦齒梟矚會風
雨於雲牖桐軒協氣滂流所以蕃百族武功燁赫可
以奠億年戴縑垂纓之士勉精勵操濟濟翼翼焉各
守其官雖使臯夔畢榮生於今日不過一奉法順流
之吏何況鄙人在易漸之上九曰鴻漸於陸其羽可

用爲儀固以輝嚴阿風萌庶亦或

聖化之助也大夫曰先生之說似矣然吾日侍

殿陛交戟之間

謨謀之密勿無不聞也

綸綍之渙汗無不見也猶不能以窺萬一今先生編
茅架壑麋鹿爲友蠹穿陳籍爲世駢拇所據無過一
拳之石所飲無過一掬之瀏又烏足以望滄渤頽岫
嶠乎處士曰不然舉燎於宵近者不如遠者之見敬

也考鐘於市誰者不如靜者之聽朗也鄙人居遠而處靜久矣在昔周成踐阼有測海而來賓漢武拓土有驗風而內嚮蓋德澤所究者有方風氣所靡者無量也大夫瞿然膝席請曰禕哉言乎先生旣明

聖德之所究請試頌之淳頤子曰唯唯夫萬事之本肇於黃鍾非聖人莫能通也然鈞石不足以權山岳尋尺不足以概圓穹乎試觀乎江海澎湃潛澍不辨西東卽以華顛之博辯未易罄其形容也請陳近事

之一二可以類推焉

皇帝嗣服二十五載視聽在民與

天爲宰德源旁魄填山溢海超羲跨昊冠堯佩舜遑
近之采水燠偏隅稔不轉睫憫一夫之失所責

躬以燮不惜帑藏千萬億漕艘銜接徵逋蠲貸斡元
氣以和浹間舉

巡方之典匪曰觀游惟吳越財賦所出是噢是咻河
淮湯湯偶潰爲民災隕林樾石水衡是督慮東堙則

西開

帝曰吁俞哉朕將臨視以究羣才陽侯天吳爭奔走
而驅蛟能工無違時役無動衆隄耳波恬屹屹鐵甕
榮光上幕元圭錫貢且夫拯民於昏墊文命所以敷
也勝殘於轡野武節所以都也然猶胼胝者八年之
久掃除氛霧弧矢是須孰與夫垂拱廟堂而坐受王
會之圖乎乃者準酋叩關鹿挺魚喁僉曰不可信
帝察其衷組繫彼降王伊犁同風

天啟式廓使之前導有點而逋有觸藩而譟

王師采入厯庭底奧二萬里外壺漿奔犒天馬寶玉
以駕鼓車抵鵲之噪拔達克山伊古未通之域一尉
一候旣雨旣膏敵克而年豐屢却走馬以糞其梁稻
疇前勲之可匹宣威信於冉駝五旬奏績因壘而降
酬庸勸忠以靖我家邦圖寫凌烟金甲玉幢衛霍不
足侔褒鄂不足蹤凡茲

乾斷盡出

一人神樞斗運授機策勲弼輔莫贊其烈留爽皆冒
以仁吾儕含哺鼓腹樂化日之欣欣子弟不知輓輸
之苦靡耆咸望

時邁之勤天瑞應誠絡繹紛縕三足之鳥一角之麟
賓連生而轆轤平慮茁而輪囷

天子萬年民皆老壽躋六合於恒春語未竟見一丈
人扶杖徐行皓髮方瞳顏如童子曰王子者之言余
既已聞之矣然亦知祈天永祚之本乎夫千章之材

千雲竦壑必有其根大海之波浮天載地必有其源
聖人之化上及太清下及太寧中及萬靈必有所尊
故有至德要道以順天下無以加於孝乎竊聞

天子仁聖纘

丕基而闡無逸事

天如事

親祇祇栗栗德馨柴告應必以實克篤

前烈若室之丹雘若農之刈稂

寢門日三

皇太后是承奉

鸞輿以周覽合萬姓歡欣以懋由庚總義畫之萬策
當

大衍之初膺壽邱華渚迓繁祉於

慈寧推

恩本孝髦俊以升却賀典去繁文搗

聖德之謙受彌松茂而川增於斯時也秋月如珪曙

河如繩禾畝九穗萬寶咸登正金風之序溯黃河之
澄數萸葉於鈿砌合仙吹於丹庭臣庶皆以祝

天子者祝

太后而

皇穹卽以佑

太后者佑

天子於茲其有徵矣皆曰願聞叟之姓字與年曰余
白榆老人也非儒非仙逍遙乎自然於周則聃耳在

商則彭鏤或以疑歲星方朔或以比授易陳搏天下
有道則見符

聖紀之洪延南極之麗天也歷歷燦燦超洪濛包元
會又烏知夫大撓甲子之循環倂倂乎振袖而去三
子者相與恂悅逡巡如覺如悟共飽德而遵路

本論 謹序

申甫

臣聞巡守之典紀自虞書周官大行人所掌王制所述或以五年以十二歲有舉必書由來尚矣伏惟

皇上體符天健勤民恤功經緯乾坤拓規萬世今年春正月恭奉

聖母皇太后安輿三幸江浙軌迹滂流至乎海表比類百則儀之於民以受上下之頌聲宏祉昔夏

后氏之勤勞天下也疏川道滯鍾水豐物陂障
九澤宅居九隩合通四海養物裕民書序其功
平成永賴今

國家布濩太和天人膺慶乘春

巡省善相土地所宜底績遠圖光曜前烈宇內含生
之物德洋鱗集舉踵思慕久而日新用使庶稱
浹乎來茲大化隆其不匱巍巍乎真兼有古帝

王之興業而立其極也

臣

蒙被

恩澤督學京兆以文字教導諸生猥廁樞密得與扈
從之末重沐

聖慈給假歸省親見江鄉父老懽忻愛戴之誠輒不
自揣舛陋設爲康衢叟東吳文學會府從臣問
答之語推原大本冀以指事紀實道揚

盛德其辭曰

有康衢叟者生居海濱屢受粟帛銜恩仰化拜於
屬車之塵於時

天臨吳會榮鏡萬象風揚雲靡載佇

聖儀川甸晞光式歌且舞過東吳文學而夸之會府
從臣在焉叟曰吾儕小人伏田間之日久矣先疇食
德耕汲太平天地所生物靡不遂竊聞

主上之聖治世之樂自開闢以來莫之或紀也今秉
陽垂照動容降音爍德懿和之風周流鸞節雖雲門
不足詠其盛隋和不足炳其觀愚者見淺何以侈諸
雖然吾含甘咀醴克葆大年負暄蔀屋而親望日月

之光十年於茲三沐休焉偉夫

乘輿之將屆也殷殷軫軫聖風雲靡百神眡令肅穆
清愉北自大江而南左建業右錢塘橫袤千有餘里
山河震疊蘊發英華麗日暉岑飛雲蓋海

天子迺導

金根之車躬履

至孝以彰天下徘徊弭節合和懽心且方春時和雨
露逢涌滲漉周乎穹壤草木蠕動之物靡有闕遺自

車駕發燕京所過免今年租賦十之三五民力不能
東作者振貸之撤減漕運

命市平價年七十以上有司勞問通關津資兵戍董
九扈恤呂刑歡聲沸海動山人神愜望奔走來賀此
誠祥習之上儀而布和之實惡也鄙人觀聽不博言
詞無文義著於宣

上澤爾東吳文學曰然叟不能更頌其大者乎我

皇上參天貳地兼綜文武北至於幽崖南至於交趾

西至於崑崙東至於蟠木九垓八表俶儻瑰瑋顧治
之猶履戶闥耳前年

聖人萬壽惟

天重命用席上觴

長樂錫厥兆民遠至二萬餘里服我成烈期應創見
懋章同軌前古無兩然猶單心緝熙勤勤懇懇載乘
鸞輅以勸化勞民惟是爲難也况東南數奉

溫詔明堂之儀靈臺之制裁足以展肆觀望雲物而

已所至農不輟耒賈不易市紀綱明密軌度易遵繇
是彰黜陟考衡量百工凝績禮樂備興鄙庠衍序之
士同聲詠歌翱翔

王路古文畢發闡釋六經宏在藻之樂鬯鳴鹿之和
昭雅頌之音述典謨之則然後申

命將帥鋪景威而講武事鏗鐘海上樹罕雲外屹如
吳嶽之嵯峨浩如靈湖之盪波正陽顯見於爍同流
天子於是淵然返鏡至精垂衣恭默欽修百祀延釐

三神行慶察察匪洽輿隸勲塞乎泰古道萃於

聖躬用能揖讓三五而光駿業也若叟所稱感身被
之澤未窺

鉅典之本非臣子編紀竹書之體要也將奚使邀聽
踵武酌之於故實者哉維時會府從臣則穆然深思
洋洋乎如神游六虛而乘翔元氣喟然興曰至哉

聖人之德推無窮而播無外也蓋亦無以名之矣所
以豫順以動拓迹垂統者屢克建非常體大事焉且

夫江浙民生所托命在河與海其源也濫衍乎崑崙
析支渠搜控清引濁長迴遠邁或浮淮而會沂或吞
江而納漢然後放乎東極之表沃扶桑蕩暘谷而休
焉從日所入匝日所出萬里咫尺而獨揚州之域湊
其利而偪其患與水同壤誠依古神聖經理天下之
要務也

皇帝思曰孜孜握要以圖度於山川而順於時動歷
攷諸古禹貢治水首冀周職方氏首揚亦以河海協

靈通氣是宗是都洵坤維之奧宅也是用

親詣淮徐攬瀦洩引遏之勢穿渠築隄以治河

臨觀龕赭物薪石沙土之宜增卑倍薄以防海俯仰

神合洞淵徹微陽侯宓妃不復太息凡漕艘賈舶之

通轉名都大邑之襟帶百川潮汐之吐納萬性鯨鯨

之騰會莫不澄瑩澹湛清宴息續超埃壻而資始蘊

泓量而大寧百姓修其疆畔日服其鑄不懈於時太

宇之下生息理極優游淳化自然永年此

聖人有事天下之本所以纘

祖宗之光烈貽子孫之軌則包堯舜三代之隆集古
今億載之福以奉

文母以成大孝勒石地表告報

皇天其餘德政秩然咸備所以功成而旋榮光四塞
島夷錫貢六合清明羣瑞宣臻合契剖符壹德昭應
巡守之典修而位育統矣於是康衢叟東吳文學嘔
喻歡喜頰手拊節同聲而歌曰

帝德嶷兮順

天紀修六府兮班五器時播草木兮化蟲蛾旁羅曰
星兮水波理高旂滇滇兮象太紫前被嵎夷兮光
帝社會府從臣依聲而賡之曰

帝祉降兮鬯元始德施博兮億及秭汾沅六幕兮廣
無涖馮螭切和兮乘龍邇奉

君曼壽兮神人喜鴻豫長生兮世函被裁成兩大兮
施孫子

樂德論

謹序

李汪度

皇上勤民展義盛典數舉自壬午來東南士庶喁喁
望

幸三載矣今年春

上乃俯順輿情恭奉

聖母皇太后鑾輦巡幸江浙慶惠便蕃德禮協洽朝

野臣民雀躍醵抃仰觀

推恩錫類有非圓頂方踵之倫所敢希冀萬一者而

聖心周普超格逾涯咸與暢遂記曰君子樂得其道
小人樂得其欲言至德之世樂其德者有大小
而人無不樂則至德所同也

臣

忝塵藝苑家近

漸江仰

德化之淳懿益爲桑梓景流承澤者慶各得其樂於

無極敬撰樂德論一篇以申下情而抒

上德謹拜手稽首以獻

下國鯁生眇見渺聞屬籍分邑初貢成均感

渥澤之湛若欣剏獲而莫能云聞天祿小史之操觚
握槩歌詠

聖仁而規倣乎崔駰之頌四巡也將造廬而自孤其
韞出里閭過市閭逐水曲經環涂見夫殷闐喜色充
溢郊衢村翁僖豎自詡蒙庥斷斷襲襲若不知佇眙
者之矜逢

茂典而欲自道其懽娛鯁生憬焉若失舌撝目眴就
小史而諏之曰大哉

聖人之德其無以加於惠我儒生乎蒙厠米廩有年
矣儒服迎

鑾寶始辛未之首春連蹇菌蠢惡焉無文美拔茅而
連茹睹

召試於闕門洎丁壬之

歲省睇逮惠乎羣英際茲春而望

幸方慮蒙之不足仰流承運也而分邑庠士咸予選
貢之

令遂先鴻膏之悃款而用厚恤吾士人言未旣小史
所然而笑曰陋乎生之爲是說也大鈞寓昌物號惟
萬亨之毒之麗鴻錫美山川出雲霖雨其遍不避不
私溥含其潤是故坐井者無以與乎蒼昊之觀測蠡
者無以與乎瀛渤之區

聖天子法乾象運斗樞醇聽洪鬯實總億兆而奠其
居周華夏而在宥厯萬載而不渝豈徒金璫玉節沆
瀣方隅勤

辰駕於四至侈博施於一夫已哉鯁生曰非是之謂也品彙晞陽向榮則欣物情善感創見則興

聖治之幬載蒙莫名夫粹醇矣卽

時巡曠典而悉數蒙實躬被雨露之維新彼夫聯榻接坐綺陌芳濇喁于謹叫抃躍瞻

雲者胡第襲爲昇平之歌舞而曾勿喻乎我心之荷恩小史曰吁有是哉生知其一未知其二也夫曰臨月照不閱歲而殊者造物之義也行慶施惠不易歲

而異者聖人之大也且子亦烏睹夫

聖德之洋溢乎

皇帝龍飛御圖於今三十載威稜愔乎夷夏惠懷浹乎埏埴登岱升崧臺懷胥逮

軫南土之沮洳屢

躬親乎澹灩河則高堰武墩鳳凰低亞微山金山雲龍激射金灣六閘洪湖五壩海則龕赭爲門尖塔是隄沙埤槌薪塘隄輦石坦水虎茈魚鱗襞積工不惜

費勞不虛擲並經營乎

三駕之勤以寧謐乎兆姓之室然而清晏奏乎守土
綢繆結乎

宸想方

省成於河濱復

相度乎海上彌思患而預防增塘石乎六百四十餘
丈也且亦知田爾田宅爾宅原隰鋪棻囷倉充碩農
不輟耒婦不停織工賈安於市鄣商旅通乎絡繹吏

無追呼民無賤賜吾與子得優游諷誦於今日者固累洽而重熙哉亦歲承平

翠華之敷錫也鰕生曰然哉然哉

皇錫之福不可意測矣願吾子竭所知以爲蒙迪小史曰吳越之墟財賦所域紀往昔之

周循幾經貸乎都邑惟歲入之正供宜勿催而自亟
迓

雲罕乎琴離邀

洞燭乎臚臆緩徵帶徵之蠲科民欠場欠之胥滌將
藏富於下民使家盈而戶殖綜前後而

賜租蓋不知其幾千萬億若夫減從省役崇樸黜靡
奉

慈輦以豫遊禡行軒以樂

志儲侍供張帑出

丙邸絲粒不撓掃除維庀月廩加乎戍夫日直增乎

舟子

眷舊臣之裔孫賚高年以銀幣罔不逾格以恢擴俾
登春乎意想所非儻及夫察吏遴材崇文講武蠶桑
昭月令之謨稼穡著

皇猷之寶旣勞農而勸耕遂程能而

課士殊尤異敏之倫入彀而獲雋者且歲益乎衡取
非惟廊童試之初枕區中三與大五優者宿以榮施
更晉階而篤祐祠墓

褒功揚清里社典洽乎告祭懷柔之外

恩覃乎喙行跂息之侶蓋

德意疊布而彌閔無不視

初禮而益許其如願以相投者有更僕終之而未易
數是以總總搏搏粒粒趨趨欽愉浩蕩嘔喻熙恬旌
倪踊躍婦孺歡欣傍

安輿而祝

嘏係

輶輅而輸謔萬口而如一不知彼與此之何以咸慙

其心然後民氣樂

睿圖邕流覽巖壑從容延訪驗夙昔所

頻經繼前聲而疊唱

天文煥發縵雲騰上凌轆雅頌陶鑄輪廣則所以鼓
舞夫樂闔者固無涯涘而所以

嘉惠文林者又日新而無方也昔

聖祖仁皇帝六幸南邦乙酉之春實

臨此疆又六十年而歲德重叶夫金穰我

皇上紹百二承平之盛致王者必世之昌虞巡協以繩

武且將垂萬有千歲以永慶固宜涵濡乎

汪濊相與飲和食德以難名何惑乎蚩蚩抃舞者之
莫喻夫子之樂子亦莫解夫熙熙者之自得而徜徉
矧惜焉哀

異數以十節概

聖德之滂洋是直舉一而漏萬奚翅筦闕而勺量也

哉鰕生蹶然而起渙然而釋曰美哉懋乎太歲在酉
乞漿得酒蒙饜飫乎

釀化並開牖乎豐蔀爰偕乎衢尊以長歌乎

曼壽

平定兩金川論

謹序

彭元瑞

維我

皇上文武聖神克集

大勲兩金川全境蕩平逆酋授首衆其母姑兄弟頭
人等生纍駢繫咸膏齊斧蓋距戊辰受降二十
有九年距辛巳平定西域十有六年前後異宜
小大殊勢惟

聖人之心無弗周故

聖人之功無弗成要其奉

天討稟

睿謨用底我

偉績是謂大同

臣恭聆

鴻捷踴躍抃舞自惟在遠不獲親見

闕下受俘之

上儀顧數年以來仰釋

諭旨

詩文審知茲事體大亦冀有所發明而見聞竅繁文
又冗弱大懼無以稱塞謹著論上下二篇殫竭
愚慮期萬一推測

神化妙用以致茲

顯功駿烈重臻疊奏之盛臣誠歡誠喜誠愧誠悚稽

首頓首

論上

金川之事昉於乾隆丙寅年受降於戊辰年亦旣包

蒙之今而征之且勦絕之前後異宜甚矣

聖人之大也天地之道風雨露雷遷化流形春生固
生秋殺亦生

聖人之道仁育義正不蔽於物不偏於用不泥於時
惟其當而已矣戊辰之受降其前事已不具論旣受
降十年郎卡復稱兵不靖倣擾其隣封狼貙獯以至
索諾木習爲故常僧格桑始變終合蚩蚩駟驢魚爛
獸鋌夫趨拉促漫我衆土司之二也其所擾之革布

什咱等亦我土司也郡縣之吏一文書相齟齬則大吏以聞於朝而從黜之有兩匹夫於此戟手而詈張拳而鬪朝廷命官治之殺人者死傷人者抵辜曰

王章也

王者無外視土司猶郡縣也視蠡屯螳聚之衆猶兩匹夫也

諭之而不革威之而不懾是怙終也虞書曰怙終賊刑矧復有至維州橋之謠維州

天子之內地禮曰以足蹴路馬芻有誅齒路馬有誅以彼黑子之地烏合之衆若羣鼠自鬪穴中耳固萬萬無至維州事而敢於造作言語無復忌憚將例以齒馬蹴芻之罪實倍萬也而能無誅乎然則前之降得無不誠戊辰之役我師采入滅此朝食窮猿投林枯魚泣釜以自丐其命安得不誠

聖人先覺不事逆億初何嘗計後此之滋擾而不受之卽安知非

昊蒼降鑒其不誠俾反復侵敗以稔其惡盈其貫而
卽嚴誅而

聖人於是奉若而不違且夫力不足以滅之故赦之
此漢唐宋中盛之時所爲也惟恐後之力不能滅之
故不赦之此漢唐宋全盛之時所爲也若乃誠則赦
之傾則滅之

聖人何庸心亦行所無事赦之惟我滅之亦惟我此
又我

國家邴隆極盛之勢振古無前者也有今之平定而後知前之受降乃

聖人之大度而非屈於兵力之無如何有前之受降而後知今之平定因彼自作之孽不得已而用之聲罪致討協乎

天心二事者交相爲用不蔽不偏不泥其斯以爲聖人之大

論評

皇帝平西域收準回兩大部五年而

大功成金川兩土司耳視西域僅百之二三亦五年而

大功成小大殊勢而

功同何也天下自外於王化者所恃有二曰恃其遠也故周宣王薄伐玁狁僅至太原曰恃其險也故三苗左洞庭右彭蠡而勞禹征高宗三年克鬼方著於易象西師之役拓地二萬里遠之至也稽古有事蜀

徼者蠶叢魚鳧開國茫昧金牛開道秦謀遂成三代
以前且無蜀矧桃關以外乎漢通邛笮冉駹以爲遠
至以文難蜀父老在今內地唐之維州陷於吐蕃旣
來旋棄牛李交鬭明平播州水西兩土司乃遵義平
越之地更爲腹裏然則金川在前代非不遠也我

國家版圖式廓一尉一候跨越無垠故金川不可以
言遠專以險金川之險阻隘而多山重岡疊嶂蔽虧
天日兩山之間人聲聞影接相去數十里夾爲阨谷

蒸爲沮洳地又多雨雪道隱氣寒逆酋於其要害築
堅碣守之森若林立矗若雲上我仰而攻彼瞰而守
肉薄魚貫不能成列故能負嶠阻兵苟延殘喘遲之
以至五年夫大且遠者謂我不能至也如彼逐禽少
縱卽逝九地九天罔不如意利在速小且險者將以
老我師也十圍五攻反客爲主網收囊括持久以困
之不病其遲

聖人之心無遠不邇無險不夷燭乎

幾先貫乎事後照之以

几席萬里如帷闔運之以

宵旰五年如一日若操

成算而符左券也禁旅出土氣奮重帑發轉饒裕土
飽馬騰民不知兵遂以摘谷噶喇宜喜鞞日旁膊昆
色盪默格爾康薩爾再剗美諾轟勒烏圍環決噶喇
依水斷魚鼈草刈狐兔長圍旣合飛走路窮詔諱緩
死終夜有聲宵壘旣闢頸組相屬濟惡之族助虐之

醜類燼穴焚巢無一兔脫茂矣美矣盛矣大矣其斯爲

大武之全功也乎昔漢誅閩粵王郢而餘善立懸宛王母寡首而其貴人不出宋虜繼遷之母而地斤澤逃奪崑崙關而儂智高不得明三定南交檻黎季犛黎澄而黎利蘖芽以叛伊古以來用師邊徼者功未有如

今日者也故有平定西域之

大功卽不可不有平定兩金川之

大功孔子曰我戰則克祭則受福

聖人之功所以成者不同其

揆幾決理以成之者則一也謂遠可負曷不觀準回
兩部謂險可支曷不觀金川兩土司揚

大清之

天聲極天覆地載六幕之內聞之者孰不陸震水聾
褫魄而膽落也孰不廩廩焉如兵在其頸也孰不如

燎火炳蓬疾風捲秋穽也殷武之五章曰赫赫厥聲
濯濯厥靈其第二章曰自彼氏羌奄有四方莫敢不來
享莫敢不來王爲

今日頌也

四子述德論

張義年

擊壤老人與康衢童子出乎詩書之門遊乎仁義之域謠立極於蒸民詠耕鑿於

帝力不識不知惟以悅懌歲在涖灘孟夏維吉期門
飲飛紛紜絡繹北向

神京歌聲合律金鐃鳴笳吹作淵淵乎有熊羆鼓之
十猛獸駭而鷙鳥擊汎汎乎葛天捉价之八達

帝功而依地德童子聽之問之老人老人不識乃仍

子墨客卿西蜀公子而問焉客卿公子曰此所謂凱歌

聖天子之所作也

天子以金川二孽弄兵潢池憫蜀人之弗乂奉

天討以無私於是鷹揚其將貔虎其師經營五載而後克之故作歌以爲凱旋之詩也老人童子曰請問金川之事客卿公子曰金川之潞在笮東北蓋古之冉駝國焉郡於漢武是爲汶山縣於開皇是名金川

自茲以降唐以置白狗之羌宋以錯保霸之蠻逮洪武而廢縣乃不設厥長官是以永樂初載則有演化寺僧修其貢職足力之麻珊瑚徑尺木香胡連毛衣左髻期以三年人以百五十洎中葉而漸侈益都綱之四百紀載於禮書炳著乎史策及至我

朝疊術附德官以土司父子承襲銅範信符金書

天勅棍八土司其數合十由斯以談金川之土爲

王土非羈縻也金川之人久爲我臣屬非外夷也乃

者逆酋索諾木僧格桑貢

恩背

德不式

王命猱猱其隣封蕩搖我邊境此亂臣賊子天人之
所咸憤者也是以劍及其國兵加其頸孫武子曰兵
者聖人不得已而用之信乎其不得已童子曰金川
罪辜可羅縷歟公子曰可惟宋之威乃唐之維有橋
鐺繩以通蕃漢往來蓋非一州之鎖鑰乃全蜀之藩

籬昔者吐蕃盜據此土竊姜維之故壘里德裕之舊
城故鴟張豕突而金躔爲之不寧促浸吐嚙思欲抵
冒州橋以迹吐蕃後塵造作謠曲煽誘部人而虐始
於四隣戕人之牧室人之室彼八土司民罔不盡趨
拉與促浸始則仇讐水火繼則狼狽駢蜚違盟棄約
分兵四攻告頑舍歸若昧若聾

王師救難竟敢嬰鋒此二酋之罪狀而西南爲之匈
匈也王竑有言曰蠻夷之頻亂由於守臣之主撫臂

驕子之啼者愈恤愈啼非流血撻之啼不止使二酋
蠢動而我不殄滅之則蜀土之患猶未熄也故

王師濯征非以喜功乃以樹

德也老人曰高宗伐鬼方三年克之說者猶以爲永
久金川之役需五載何也公子曰以險岷山之精上
爲井絡倫狼藏幢礫乎岳岳蔥路鳥道十步九却揚
雄所謂蒼山隱天岏嶮迴叢增嶮重翠者也雪山九
峯狗嶺相亞元冥司方祝融退舍冰方春而腹堅雪

當暑而尚下羌無夏而有冬奚四序其代謝揚雄所
謂霜雪終夏叩巖岑嶙峋崇臨積柴者也石室十丈鬱
確其高昔稱叩籠亦字曰雕逾金鐵之堅固等五岼
之嵯嶺揚雄所謂并石石孱岵岑倚從者也僂讓彼
尼厥土剛鹵夷獠生焉剽悍愚魯以土圉爲宮室以
戰牧爲場圃以金穹鐵簞爲耒耜以斬殺攘奪爲播
穫左思所謂剛悍生方風謠尚武者也日入之部卽
火之獠鳥獸其心而髮膚其貌其飲食以牛羊青稞

其衣服以桶裙花帽其貿易以紅椒白鹽其器械以
膜弓鐸鞘婚姻則氍毹刀弩矢贈遺要結宴樂則銅鼓
橫笛婆娑舞跳彼其喜人怒獸貪狼桀驚曾禮讓所
不居亦自昔王化所不校者也天時地利旣如彼人
情習俗又如此使以殷高宗當此之時雖十年不能
平也奚亶五年哉童子曰其虔劉之灋若何公子曰
趨拉之壤則有美美之卡木南之壩南則翁古爾壘
赤爾丹思西則達圍資里阿喀木雅僧格宗屏其前

明格宗彌其罅由席捲乎諸道斯竹破乎美諾之官
舍遂乃星流電掃迅若風颺兵取乎別思滿八卦碉
檄下乎底木達大板昭澤旺以之禽獲僧格桑以之
雉逃合螳蜋而拒轍旋鴟鳥之覆巢此露布之首

奏也趨拉旣摧促浸是搏扼險要於谷噶奪門戶於
羅博俯拾朋普仰拔喇穆破木城於該布達諾火寨
落於格魯瓦角維繞攻乎默格爾山梁遂進得乎密
拉噶拉木至若康薩爾巴木通木思工噶遜克爾宗

昆色拉枯苗則大海暨轉經樓與剌章噶咸拱護乎
勒烏圍我師之撻伐也或雪晴躍馬或雨霽貫弓或
乘霧法軒轅之討或踏月效崑崙之攻或發鳥嘴或
用噴筩或迅雷奮地或火彈飛空或拽橋斷援或囊
土摧崇或三日占卅里之地或一夕收數載之功此
露布之再

奏也西里峯嶺障噶喇依以喇烏喇爲屏蔽以瑪爾
古爲門畿遠則索隆科布近則雍中舍齊綽爾丹格

薩木之山梁旣占則朗噶克了口之伏兵斯磨越深
箐叢林以密布遂驚崖落礮而紛披據得爾隴之要
害挾喇嘛寺之藩籬琕弓大羽幢竿雲梯士勇益奮
賊潰不支窮猿之臂左折妖鳥之翼右垂旣建旆以
得勢遂噶依之密圍而况對河布置後路芟夷獨松
之河波悉淨瑪邦之羽檄如飛諸軍雲合千騎霧密
水截蹙鯨之穴陸斷狡兔之窟礮電激而雷轟礮柱
折而維絕燕巢幕而甚危魚遊鼎而煎迫爰搖尾而

乞憐挈全家而並出此露布之三

奏也貳負天誅相柳人獲兩川砥平西陲寧謐吳起曰在德不在險此之謂也老人曰師之得雋

君之德歟師武臣之力也客卿曰非有禦侮之臣不足承蹶生之君非有含良之君不足知冤冒之臣故易曰雲從龍風從虎聖人作而萬物覩金川之始亂守臣以爲鞭長莫能及天險不可升但須威讓不假

兵興

皇帝以爲蠻觸之交爭可恕豕蛇之荐食當膺則韓
子所謂惟斷乃成也地形通掛皆聚於圖師徒舍合
莫備於書

皇帝按圖攷籍昭明有融擊寇掌上擒虜目中

指授方畧因以成功則孫子所謂廟算勝也大將者
國之輔也輔周則國必強

皇帝簡老謀之將爲大帥倭絨布之兵於宜喜大則
傾其腹心小亦脫其股趾則韓信所謂善將將也八

旗勁旅天下之精兵也尼而不出豈能觀厥成

皇帝選健銳火器之卒吉林索倫黑龍江之衆七千人風馳雨集以赴西營綠旗觀感遂共橫玉弩而直進金鉦師直爲壯而出以律兵不在多而貴在精則趙奢所謂將勇者勝也由是觀之今日之績仰承

皇帝之廟謨故能將帥同心士卒效命厯五載之久奠玉壘而靖金樞也老人童子曰金川之事旣聞命矣古者師出有功則嘉會以行其典禮故書有錫弓

之命雅有出車之詩周官著獻社之典戴記垂告學之詞策勲飲至之禮則春秋傳載之今師旋之後亦有此典乎客卿曰奚翅於是

東陵者

今代之鼎湖也

西陵者

今代之畢原也

皇帝以武成之故謁

兩陵展

孝思而三捷之至適邁厥時覲

光揚

烈徵顯於斯夫豈但呂嘉獲而縣獲嘉南越破而邑
聞喜哉遂乃奉

慈輦舉

時巡陟泰岱禮嶽神豐融膺蠶升中於

天非封非禪超軼乎七十二君則典邁乎告社遵洙

泗至海邦奠金絲之舊宅經鄒魯之遺封

鸞旗至止車服雍容將獻功於在泮先虔禮於魯宮
則典崇乎告學我振旅之次良鄉正旋

蹕之駐黃新莊

天子乃舉郊勞之禮以勤歸乎同澤同裳則典軼乎
勞還

王師大獻

金門洞闢纍纍其俘厥角平城則獻囚之禮行焉內

而帷幄外而折衝論功行賞爾侯爾公則策勲之禮
舉焉山豆瀛尊左右有秩矯矯虎臣是飲是食則飲
至之禮舉焉至若

紫光之閣在太液之濱圖形繪像則百斯臣則又遠
過乎凌烟之二十四氣雲臺之二十八星彼史籍之
盛事曾何足以比倫客卿之詞未終老人童子肅拱
而稱曰至哉

聖人之德乎雖黃帝之軍訣司馬法之軍法曷克以

方茲客卿曰不寧惟是典更有巨於此者請爲子陳
之古之冊禮或因上壽或由禋祀未有大武告成而
進介福於王母者也

皇帝殫報

德之深情極歸

功之

睿思乃超越古今而特舉斯禮於是涓良辰練吉日
建

徽號於

金章述

徽音於

玉冊發隆儀於

大庭奉

鴻名於

慈極揮

寶翰之昭回燦瑤華之璩飾而且前期一日祇告於

天神

地元

太廟後殿

奉先殿

社稷之神典至碩也

皇帝恪恭將事親率在廷諸臣恭進

冊寶肅穆其容愉懌其色然後綏

長樂之

春暉奏

萬安之仙闕

孝治以之益隆天經以之愈赫斯真堯驟舜馳欲躡
蹤而莫及者也至若置斥堠度疆域列將校鎮夷服
起屯田休戍卒保蜀陳安反側九折劇其差戾七盤
夷其巢業然後山川欲歆日月開闢青陽駕迴萬卉
苞蘖被之以聲教綏之以
文德蓋莫不熙熙乎翱翔

化宇而會歸

皇極也若乃

鑿輅所經

鴻恩愷澤增廣士林鴻漸之塗裒益卒更月糈之秩
維正之供蠲除眚災之過盪滌俾

慈惠之緒布濩流衍而不韞韞郁郁乎丕天之

大烈其疇能測識之哉老人童子曰倬彼雲漢爲章
于天寧第凱歌示喜乎敢請其餘客卿曰以管窺天

者不足窮浩博之觀以錐指地者不足極輪廣之數
天子之文遠矣大矣衆矣博矣豈愚妄所克知乎今
且舉其一二以廣子之心志昔漢臨瀚海封狼居山
耿至和渠鏤石燕然班超紀功於柳谷葛亮銘績於
南寧此皆臣下之文也然猶勒崇垂鴻焉奕乎千載
震驚乎百蠻我

皇帝天幕日煥神晝常昭乃奉寶附之藻采驅墨海
之波濤述二酋之弗諱序三帥之勤勞紀

豐功於荒裔銘

偉績於岌嶢或以鎮促浸之穴或以樹趯拉之巢陋
玉斧以畫江笑銅柱之建標巍巍乎江漢采芑編周
雅而垂萬禩爍乎螺書龍畫儷禹碣而煥九霄豈比
夫周穆臨春山而銘跡平圃漢武望巨海而勒石天
橋哉於是二子醉於

盛烈飽於

醲德相與蹈仁履和終日謳吟忭躍而悅服

省方通德論

吳省蘭

康衢庶老蹈觚鬻豫含哺籥幽鮮服儷柘紆脾耀銀
輶輶殷殷熙陽春之舒疊送

寶軼於五巡撰杖躡躡言遊莊廋至則

輦路不趨天香茵蓋肩摩趾趺聯襪續紛精鏤雪聚
重錦霞屯就

帝容之溫睟徐

天語之朗聞

玉鞭遙指十資駢田提囊挈伺佰佰仟仟歸而里胥
奉縣帖至貳以壺漿豆脯白粲朱提爛其盈門庶老
於是衍愉貽愕竟昔不自勝翼日過吒於具茨處士
曰至矣哉

天子之盛德也蒙亨昇平之福久矣朔乾隆丙辰臬
於茲日賜復之令靡虛歲振貧靡虛月普蠲漕輸者
再全豁丁賦者三機積華穀靡餘紅粟室家漆漆幾
忘

帝力何

九重視之亟若起瘡痍而拯饑溺也

和鸞四展今斯次五吳會饒沃益勲益撫氓之蚩蚩
曩拜匪頒感若次於肺府嘗鬱測鼎知出諸太府者
摩醯隸首不能悉數也不已惠乎不已費乎夫賦緡
不加征而慶賞不量節疇弗足而補先之疇弗給而
助及之俟應方來樂重萬疊推

恩將又倍焉熙何以爲緝也吾子治聞彊識願以鏡

於古者導之處士矍然曰鄙人膚受烏足以揚權

聖人之德間誦邱牒咫聞則又夥焉矣源先委後惟
河與海權滉澗之節宣量清口之水誌梁荆山而渠
醜建木龍而澤灑彭城迤西武墩迤南金灣牖六高
堰壩五六塘閘閤中河納甌甃石構輒剏隄築土則
導河之昔軌也三疊候潮不南卽北

辭而闢之斯恁鬢剔彼鹽官之斗城枕鷺濤而潏滅
兩山尖尖束之實逼簾竹綿延盤薪交櫟椿馬牙以

準鐵石魚鱗其規城水坦斜郭土備內搯鬪角鉤心
俾不墜以不疆則

振海之成績也自旃蒙作噩以來一十六載清矣平
矣乃櫟乃櫛乃彌厘

皇情履鹽倉循文港餞柴資鞞勒石利輦繹繹屬屬
蓋數千丈若擴雲梯之委若培高堰之基舊章有秩
閱陶莊新河加廣之工不計鉅費不計帑彼儀封考
城之竹絡茨防猶不在是量也其咨伊耆載傲有姚

禹曰孜孜八載而遙以今揆古孰若

帝躬之勞也容校竿經費細已甚矣僕耽邁軸鈔納
檢鑽旭旭乎孰能名

帝德之高哉願偕容襄塗京雒走諸朝而諏諸卿大
夫庶老曰嘻何子之瞽也卿大夫朝亮職業晝勸庶
政夕庀其家不惶啟處待叩則那且溫室之樹不言
而疇與若揣稱乎

聖涯聞泰濛化人心珠灤瑩智流普慧九譯遞表旦

暮且至盍筵上下其論議處士曰唯唯宿春糧具膳
鞅度留幹涉武列化人方卓錫琳宇供華奉鉢者若
大雲之葉垂綴綴也迺齊絜請問偃僂將有所啟化
人摩其頂盱衡而言曰二客來亦邊矣何優游

嶠載而高厚不知且我謀來卽也居吾語女夫日月
之不可以藻績摹者爲其難爲光也鏞鐘之不可以
寸筵敬者爲其難爲響也易曰乾元用九乃見天則
九於數爲老陽故稱乾焉六爻發揮九五在天五爲

中數故五位相得遞積以及於無窮則時乘六龍以御天是也粵稽古演疇皇極次五五福敘時庸以敷錫夫遠取物爲極近取身爲德

皇帝次五展巡修典需施以啟來茲

德有自植矣夫旼旼穆穆鈞旋轂轉

昊絳之微妙也

聖人效之巍巍蕩蕩垓暢挺沂

謨顯之純洽也

聖人法之泰清寥勿視聽自民惠鮮懷保受命中身
故爲效爲法惟誠民

劭勤民數曰萬聯之以情政用有八馭之以誠且八
政曰食曰貨食貨之源生天成地在損上益下以優
裕之王之所以大也是以闔播春祺

親敘政本覲土趣壤洽風清眈使簞邈迪於晃眼藎
敷得阜乎粵宛自上下下徧給其欲而出無恡焉是
以懸逋予蠲戶課予免算緡予減運綱予展頓置格

酬扈從倍祿丞徒倍廩初服倍粟廣生員第嘉頌基
俊乂也敘清級簡部伍稱軍吏也蓼蕭飫收溥需重
也業榜登耆樂引年也復輦帶宥鈇鉗予自新也珪
幣賁祠縮酌逮壘申精禋眷舊勲也原泉逢涌取之
無方中衢置尊酌言以嘗周泊徧照而無遺者

聖皇蓋積諸不涸之倉也且夫水生天一土穀順成
昔文命則壤成賦手足趼胝河澶以治顧弗及乎太
癘何則鴻濛肇闢巢窟經營東南揚州厥土下下賦

下上上錯地廣斥而人牢落誠不必與陽侯水伯尺
寸校爭故陂滌無所施能也迄於蒼姬貫利使同稻
以宜穀鳥獸以宜畜民有二男五女利有竹箭金錫
土訓道其方慝稻人掌其稼澤戶籍田結府海官山
迺埒於西北

聖朝題五德之期聯天理物坯冶一陶絲粟魁格鹽
鐵具條風帆雲漕舳屬鱸翹儲贍濟於東南逾江淮
達運口長河橫貫繩引絲交撤薪爨金賴智者之手

操也滄溟東趨沃蕩龜赭海昌一城與波激射襟吳
地於下游捍軒淪之騰瀉陷陲重隄數州生聚之攸
倚藉也是以

聖祖六馭六勤疏山采石徹壅通陲時其鍾洩以安
水藏而平繇告於河渚

世宗撫五辰以凝績旁燭四瀛厘奔湍之駕軼迨綱
繆於未雨而靈渤底寧

皇帝榮鏡宙合昶樞紐於太微承

重光以繼照鏘哉鳴轡江介來勞一至再至以念之
三至四至而蒔之斟酌者衆灌輸者大是故陶莊廨
引

御椿所標以示要也顰堰束淮屹塘障澥

宗功所揭以辰告也辛未自今展軫

五幸經始而求多福圖終而致永安有成效矣水土
乂矣下田上腴輓犁雲布刮鹵雪敷財以工化賙以
商輸華實之毛隱賑夥鉤胥我

皇之外府也費何虞焉平成旣奏珍符備至九功九敘以隳泰上成鳩之治所謂乾始能以美利利天下不言所利者也勞曷計焉且夫

聖人之所爲固非常人之所可語也或習焉不加察或由之不能知然而經綸化育襲土律時道豈邈哉有儉德以維之有敬德以丕之有恒德以持之人見爲勞且費

至誠篤恭於無爲故

大德備祿位壽而令名洋溢而四施昔越裳驗海而
奉白雉月氏占雲而貢神香此謂小康猶孚聲影而
况

聖世余是以涉戈壁之遙由極樂之國轉輪震旦鼓
舞驩忻來覲

至德縣所誦述祇

巡方之匡畧儻儗全量猶望一而漏百也二子懽墨
忸怩遂收欲退化人曰姑俟之請授子以三章之詩

三才圖會卷之二
儉德詩曰汨汨河海絡吳包越

帝舉五巡澄懷恬豁式顯崇淳宮蒿柱栝卑服豐施
烝哉夏脰

敬德詩曰康功在宥行水徂南匪遊匪觀幾萬日僉
胥升淮浦豫州已濫丕應稊志格於

至誠

恒德詩曰天地數五遞積而上維

聖時邇邇孚民望旣宴而清式承

靈貺乘日之車與

天同量二子乃憬然並稱曰鄙人今乃知

聖天子之德曩者妄有擬議何異捧土塞河傾蠡酌
海也幸得聞廣長之舌震若發蒙怡焉相悅以解